

四庫全書

子部

欽定四庫全書

子部

名賢氏族言行類稿卷八

詳校官典籍

臣潘奕雋

王事

臣

祁韻士覆勘

總校官進士

臣朱

銓

校對官中書

臣

張曾炳

膳

錄監生

臣

安樂宇

欽定四庫全書

名賢氏族言行類稿卷八

宋 章定 撰

于 百五十一

姓纂周武王第二子邾叔子孫以國為氏其後去邑
單為于氏 東海漢有于公生丞相西平公定國生
永御史大夫

前漢于定國字曼倩東海郯人也父于公為縣獄吏郡

曹決獄平郡中立生祠號曰于公祠 言殺孝婦而旱
定國學法于父亦為獄吏以材高舉侍御史遷御
史中丞起為廷尉朝廷稱之曰張釋之為廷尉天下
無冤民于定國為廷尉民自以不冤 遷御史大夫
為丞相封西平侯 子永嗣至御史大夫 始于公
其間門壞父老方共治之公謂曰少高大令容駟馬
高蓋車我治獄多陰德未嘗有所冤子孫必有興者
至定國為丞相永為御史大夫封侯傳世云

魏志于禁字文則攻張繡禽呂布圍張超攻眭周皆破
斬之太祖曰將軍在亂能整討暴堅壘有不可動之
節雖古名將何以加之

北史于栗磾少習武藝材力過人 劉裕嘗遺其書題

曰黑稍公麾下栗磾好持黑稍故有其號明元因授
為黑稍將軍 自少總戎迄於白首臨事善斷所向
無前 謙虛下士刑罰不濫 子洛拔為侍中尚書
令百寮憚之任參內外以功名自終 洛拔子烈善

射少言有不可犯之色累遷殿中尚書 氣槩沈遠
有柱石之質殆禦侮之臣乎

于忠字思賢累遷散騎常侍嘗因侍宴宣武賜之劔杖
舉酒屬忠曰卿世執貞節故恒以禁衛相委昔以卿
行忠賜名曰忠今以卿才堪禦侮以所御劔杖相錫
後為尚書令

于勁字鍾葵為定州刺史自粟磧至勁累世貴盛一皇
后四贈公三領軍二尚書令三開國公

于謹字思敬畧窺經史尤好兵書 或有勸之仕者謹
曰州郡之職昔人所鄙台鼎之位須待時來 累官
至大司寇 負佐時之畧逢周文興運之期為大廈
之棟梁擬巨川之舟楫卒以耆年碩德譽高望重禮
備上庠功歌司樂常以滿盈為誠覆折是憂 謹為
三者賜延年杖武帝幸太學以食之 謹既平梁周
文令司樂作常山公平梁歌十首使工人歌之 名
位雖重愈存謙挹功臣中特見委信始終若一人無

問言 子孫繁衍皆至顯達 子實

于實字實實累遷尚書 實子顓字元武拜吳州總管

以頻敗陳師賜綵數百段 弟仲文字次武九歲嘗

於雲陽宮見周文帝問曰聞兒好讀書書有何事對

曰資父事君忠孝而已周文甚嗟歎之 後為安固

太守州刺史屈突尚坐事下獄無敢繩者仲文窮之

遂竟其獄蜀中語曰明斷無雙有于公不避彊禦有

次武 實弟翼字文若為渭州刺史實先蒞此州翼

又推誠布信事存寬簡夷夏感悅比之大小馮君

後為安州幽州總管翼兼文武之寄受干城之託智能足以衛難勢力足以勤王曾無釋位之心但務隨時之義弘名節以高貴豈所望於斯人 子璽字伯

符隋初歷汴邵二州刺史並有恩惠 翼弟義字慈

恭仕周遷安武太守專崇教化不尚威刑郡人爭財相訟義以家財分與二人喻而遣去二人各懷恥愧移貫它州 子宣道字元明仕隋遷內史舍人 宣

敏字仲達年十一詣周趙王招命之賦詩詩甚有幽
真之志坐客莫不嗟賞仕隋拜奉車都尉奉使巴
蜀還上疏帝嘉之曰于氏世有人焉常以盛滿之
誠昔賢所重每懷靜退著述志賦以見志焉

節義于什門魏時為謁者使馮跋不拜拘留二十四年
後歸拜侍書御史

唐于志寧字仲謐京兆人貞觀三年為中書侍郎晉
王為皇太子拜左庶子監修國史與張行成高季輔

俱賜田志寧辭分其田以與二人 凡格式律令禮
典皆預論撰 與司空李勣修定本草并圖合五十
四篇其書大行

于休烈志寧曾孫機鑒融敏善文章第進士又擢制科
歷祕書省正字 肅宗立兼修國史 時經大盜後
史籍燔缺休烈奏獻史籍進官 獻五代論詩著舊
章天子嘉之 雖歷清要不治產性恭儉仁愛樂賢
好善推轂士甚衆年老嗜學不厭

于頔字允元後周太師謹七世孫有專對材為湖州刺史有湖陂久廢命修復歲獲秔稻無慮萬計改蘇州為政有績為陝虢觀察使宰吏重之貞元中拜山南東道節度使吳少誠叛頔禽其將昌黎先生有上于襄陽書又送許志雍序云是非忠乎君而樂乎善以國家之務為已任者乎即頔也

于公異進士擢第李晟表為掌書記朱泚平露布於德宗曰臣既肅清宮禁祇奉寢園鍾簏不移廟貌如故

帝咨歎一再

蘧

百五十二

姓纂衛大夫蘧瑗字伯玉之後漢大行令蘧正

左傳定公十年宋公子地嬖蘧富獵十一分其室而以
其五與之

論語君子哉蘧伯玉邦有道則仕邦無道則可卷而懷
之

家語外寬而內正汲汲於人以善自終蘧伯玉之行也

舒百五十三

風俗通云舒子之後以國為姓

唐舒元與婺州人元和中舉進士見有司鈎校苛切既
試尚書雖冰炭脂炬食具皆人自將吏一倡名乃得
入列棘圍席坐廡下因上書言古貢士未有輕於此
者俄擢高第裴度表興元書記文檄豪健一時推
許拜監察御史自負才有過人太和五年獻文闕
下不得報上書自言所上八萬言其文鍛鍊精粹出

入今古數千百年披剔剖抉有可以輔教化宣主父
可比哉 元興唐中葉文士也今其遺文所存者才
二十四篇既以甘露之禍死文宗因觀牡丹摘其賦
中傑句曰向者如迂背者如詖折者如語含者如咽
俯者如怨仰者如悅為之泣下予最愛其玉筍篆志
論李斯李陽冰之書其詞曰斯去千年冰生唐時冰
復去矣後來者誰後千年有人誰能待之後千年無
人篆止於斯嗚呼主人為吾寶之此銘有不可名言

之妙而世或鮮知之

見容軒
隨筆

宋朝舒亶字信道明州慈谿人也擢進士調臨海尉民有使酒逐其叔母者亶命執之不服即斬之投効去王安石當國聞而竒之為審官院主簿熙河路分

畫疆界命亶馳往于時洮隴新喋血亶即日引道至則示以朝廷威信夷人以肉置刀頭啗亶亶以口承之衆皆歡呼使還提舉兩浙常平召為太子中允御史裏行崇寧初辰州蠻叛以直龍圖閣知荊南府

亶選形勢得飛山福純坡建新城為控扼之要以功
除龍圖閣待制卒

俞

又音吐溜反百五十四

前趙劉聰中常侍俞容天后時有俞文俊江陵人也
俞紫芝字秀老揚州人少有高行不娶得浮屠氏心法
所至翛然而工於詩王荊公居鍾山秀老數相往來
尤愛重之每見於詩所謂公詩何以解人愁初日芙
蕖映碧流未怕元劉爭獨步不妨陶謝與同遊是也

秀老嘗有夜深童子喚不起猛虎一聲山月高之句
尤為荆公所賞和云新詩比舊仍增峭若許追攀莫
大高秀老卒於元祐初惜時無發明者不得與林和
靖一流槩見於隱逸其弟澹字清老亦不娶滑稽善
諧謔洞曉音律能歌荆公亦喜之晚年作漁家傲等
樂府數闕每山行即使澹歌之然澹使酒好罵不若
秀老之恬靜一日見公云吾欲為浮屠但貧無錢買
祠部耳公欣然為置祠部澹約日祝髮既過期寂無

耗公問其然澹徐曰吾思僧亦不易為公所贈祠部
已送酒家償舊債矣公為之大笑黃魯直贈澹詩其
一有云有客夢超俗去髮脫儒冠平明視清鏡正爾
良獨難蓋述荆公事也

孟
百五十五

晉大夫食采孟邑因氏焉晉有孟丙衛有孟壓

邴
百五十六

周武王子邴侯之後後漢有上谷太守邴侯

禹 百五十七

禹強之後出姓苑

愚 百五十八

愚公之後今無聞

巫 百五十九

風俗通凡氏於事巫卜匠陶也殷有巫咸巫賢漢有冀州

刺史巫捷又有巫都著養性經也 巫伋 紹興二十年作樞參

母 百六十

母丘氏或為母氏開元右補闕母渠洛陽人一云吳人

塗
百六十一

風俗通漢有諫議大夫塗禪又塗子真治尚書

涂
百六十二

洪州人因水為姓

都
百六十三

吳興人姓苑云有臨淄侯都稽臨淄人也

區
百六十四

風俗通云歐冶子之後轉為區氏又音歐吳有區景長
沙人官至蒼梧太守

瞿 百六十五

晉東海王越參軍瞿莊博陵人也又王僧孺譜云河東
裴桃兒娶蒼梧瞿寶

衢 百六十六

江陵人見姓苑

俱 百六十七

南涼有鎮北將軍俱延開元國學博士俱匡辟

句 百六十八

須句風姓之後見左傳

萋 百六十九

官氏志云一那萋氏其後改為萋氏

須 百七十

風俗通太昊風之後有須句國又殷有密須並以國為氏魏有須賈漢有平陸侯須無紹封四代

呼

百七十一

列仙傳有呼子先

寧

音呼百七十二

姓苑云沛人

芻

百七十三

牛哀食芻改姓芻氏見姓苑

辜

百七十四

今泉州晉安有此姓不詳所出也

父 百七十五

尚書父斯舜臣咎繇所讓二十六人南朝有父嘉興父

季真

諸 百七十六

越大夫諸稽郢之後後漢洛陽令諸於

儲 百七十七

後漢儲太伯又富人儲老王莽亂以五百人據大庾嶺

開元汜水尉儲光義潤州人生石石生燕客生嗣

宗使下校書生隱檢校郎中

骨百七十八

晉大夫骨臣之後有骨甲父骨克骨梁帶骨午骨童

琅琊姓苑云琅琊有骨氏

廬百七十九

左傳廬子戢黎之後

如百八十

桓譚新論有通人如子禮漢書長安富人如氏 馮翊

晉中經簿魏陳郡丞如淳注漢書 河南官氏志如

羅氏改為如氏大歷有右羽林將軍如元曜

茹 百八十一

見姓苑河南官氏志普陋茹氏改為茹氏又蠕蠕入中

國亦為茹氏

沮 音菹百八十二

黃帝史臣沮氏後 廣平魏志袁紹謀臣沮授 前燕

中常侍沮浩

於百八十三

出姓苑大唐初宇文化及將於士澄以魏州降

渠百八十四

周大夫渠伯之後衛有渠孔漢有渠參封贊侯

樗百八十五

史記秦相樗里子之後名疾

居百八十六

晉大夫先且居之後以王父字為氏漢有來城侯居般

餘 百八十七

晉有餘顏著複姓錄自云本出傳氏前燕錄有餘玄餘和餘嚴餘崇並鮮卑種類

興 百八十八

周大夫伯興之後以王父字為氏 河南官氏志莫興氏改為興後魏有興珎見賀拔勝傳

苴 子餘反百八十九

平陵漢書貨殖傳平陵苴氏

鉏 百九十

左傳晉有鉏麇

壺 百九十一

衛有壺黯漢有諫議大夫壺遂列仙傳有壺公

蘆 百九十二

河南後衛官氏志莫蘆氏改為盧或亦為盧氏

奚 百九十三

姓纂曰夏車正奚仲之後

尚書仲虺之誥湯歸自夏至于大坰仲虺作誥

仲虺臣名奚仲

之後

北史奚斤代人也仕魏為侍郎親近左右後為左丞相世稱忠孝每議政多見從用朝廷稱焉

奚牧重厚有智謀魏道武寵遇之稱曰仲兄數奏政事參與計謀以征伐功拜并刺史

奚眷少有將畧道武世有戰功為武牢鎮將為寇所憚奚康生世為部落大人少驍武彎弓十石以功除征虜

將軍 歷青華涇湘四州刺史

唐奚陟字殷卿京兆人少篤志通羣書大厯末擢進士
文辭清麗科授弘文館校書郎 崔河圖使吐蕃表
陟自副 江南淮西大水詔陟勞問所至人人便安
病癰帝遣醫療視敕曰陟賢臣為我善治之 少

自砥礪著名節嘗薦權德輿為起居舍人知制誥楊
於陵為郎中 劉禹錫銘陟墓曰其先在夏為車正
以功封于薛中古以降為譙郡人或因事適楚復之

秦今為京兆人子敬則歷大僕少卿敬玄以詞藝登
文科為刑部郎亦舉進士

嵇 百九十四

姓纂曰夏少康封子季杼於會稽遂為會稽氏漢初
徙譙稽山改為稽氏譙郡後魏官氏志統稽氏改
為嵇氏

晉嵇康字叔夜其先姓奚避怨徙家于稽山之側因而
命氏龍章鳳姿天質自然與魏宗室婚拜中散

大夫 彈琴詠詩自足於懷為竹林七賢之遊 呂

安服康高致每一相思千里命駕 子紹

嵇紹字延祖起家為祕書丞王戎曰昨於稠人中始見

嵇紹昂昂然若野鶴之在雞羣 裴頠曰使延祖為

吏部尚書可使天下無復遺才矣 累遷為侍中

嵇含字君道好學能屬文家在亳丘自號亳丘子門曰

歸厚之門室曰慎終之室舉秀才除郎中 後轉中

書侍郎 含性通敏好薦達才賢

黎 百九十五

姓纂曰黎侯殷周時候國風俗通云九黎之後尚書
西伯戡黎亦見毛詩左傳齊大夫黎彌黎且字亦作
犁宋城唐左拾遺黎昕 九真洛陽尉黎迴愛州人
壽春京兆尹黎幹生姚燧炬焞焞 焞生植右散
騎常侍河南官氏志素嵇氏改為黎

左傳定公九年齊侯伐晉夷儀東郭書讓登犁彌從之齊
侯賞東郭書辭乃賞犁彌

北史儒林黎景熙字季明少以孝行聞於世好讀書強
記默識而無應對之能落魄不事生業有書千餘
卷不以饑寒易操後拜著作佐郎勤於所職著
述不急性尤專固不合於時一為史官十年不調
終儀同三司

唐黎幹戎州人善星緯術善議論遷京兆尹以治稱

注

音圭百九十六

後漢儒林注丹字子玉傳孟氏易建武初為大鴻臚作

易通論七篇世號洼君通易家宗之稱為大儒

齊

百九十七

姓纂炎帝姜姓之後太公望姜子牙受封營丘為齊國氏焉又衛大夫齊惡齊豹戰國時齊明周人也

春秋書齊豹曰盜三叛人名以懲不義

唐齊澣字洗心定州人少開敏年十四見李嶠嶠稱有王佐才中宗在廬陵澣上言請抑諸武迎太子東宮不報及太子還武后召澣宴同明殿諭曰朕母子如

初卿預有力焉方不次待爾 及進士第以拔萃調
蒲州司法參軍 景雲初姚崇復相用為給事初中
書舍人論駁及詔誥皆援準古誼朝廷大政必咨之
時號解事舍人時宋璟在廣州勸崇舉自代 為汴
州刺史以清毅聞吏民頌美 李元紘當國表宋璟
為吏部尚書澣為侍郎世謂臺選嘗奏事帝指政事
堂曰非卿尚誰居者

歸百九十八

唐歸崇敬字正禮蘇州吳縣人治禮家學多識容典擢
明經天寶中舉博通墳典科對策第一有詔舉才可
宰百里者復策高等授左拾遺代宗幸陝召問得
失崇敬極陳生人疲敝當以儉化天下大厯初充吊
祭冊立新羅使囊橐惟衾衣東夷傳其清德八年
遣祀衡山未至而哥舒亂廣州監察御史憚之請望
祀而還崇敬正色曰君命豈有畏耶遂往田悅李
納稟命持節宣慰稱旨表歸上冢寵賜繒帛儒生以

為榮晚以兵部尚書致仕 子登

歸登字冲之舉孝廉高第正元初策賢良為右拾遺裴延齡得幸德宗欲遂以相右補闕熊執易疏論之以示登登曰願竄吾名雷霆之下君難獨處故同列有所諫正輒署無回避轉右補闕起居舍人凡十五年順宗即位以東宮恩超拜給事中遷工部侍郎復為皇太子諸王侍讀獻龍樓箴以諷徙左散騎常侍入謝憲宗問政所先登勸順納諫爭內外傳為讜言

後進工部尚書卒 登性寬恕常慕陸象先為人

子融

歸融字章之及進士第開成初拜御史中丞遷兵侍出
為山南西道節度使徙東川還歷兵部尚書會昌後
儒臣少朝廷禮典多本融議

倪百九十九

姓纂曰郝武公封次子于鄉是為小郝後失國子孫
為鄉氏避仇改為倪 鄉城在東海

唐倪若水字子泉怡州人擢進士第遷監察御史黜陟
劔南道繩舉嚴允課第一 開元初為汴州刺史政
清靜增修孔子廟與州縣學廬勸生徒身為教誨風
化興行玄宗遣中人捕鵠鵲鵲鵠南方若水上言帝
手詔褒答

宋朝文藝倪濤字臣濟廣德軍人博學能文有操履舉
進士擢太常博士遷校書郎著作佐郎賜對除司勳
員外郎遷左司 朝廷議有事燕雲濤獨曰毋輕議

以貽後患宰相怒曰左司敢沮軍事耶罷監朝城縣
酒稅再謫茶陵造船場 有詩文號雲陵集

倪偁湖州人乾道間任太常博士 子恕思愿皆登科
兒 二百

姓纂曰卿黎來之後亦為兒氏

史記儒林兒寬通尚書以文學應郡舉詣博士受業貧
無資用常為弟子都養行常帶經止息則誦習之以
試第次補廷尉史張湯以為奏讞掾以古法議決疑

大獄而愛幸寬寬為人溫良有廉智自持而善著書書
奏敏於文口不能發明也湯以為長者數稱譽之薦
之天子天子見問說之後位至御史大夫在三公
位以和良承意從容得久然無有所匡諫於官官屬
易之不為盡力 漢書云千乘人也 帶經而鉏

見上語經學從問尚書一篇擢中大夫遷左內史

吏民大信愛之 以負租課殿當免民恐失之大家
牛車小家擔負輸租繼屬不絕課更以最 對封禪

之事

御史大夫未有及寬者

劉向傳

儒者通於世

務明習文法以經術潤飾吏事

循吏傳

泥

二百一

見姓苑代本云宋大夫卑泥之後

卿

二百二

左傳卿黎來來朝魯小邾君也子孫以國為氏

稽

二百三

黃帝臣太山稽之後風俗通云稽黃秦賢人也

西 二百四

姓苑云西門豹之後改為西

犀 二百五

史記秦有犀首

鞮 二百六

姓苑風俗通云晉銅鞮伯華之後

適 音蹄 二百七

洞州澄城縣多此姓自云本銅鞮氏避事改焉亦單姓

蹄

踎 古隄字二百八

人姓見纂要

鮭 音珪二百九

中山後漢有鮭陽鴻為少府傳孟氏易

毒 下珪反二百十

人姓見纂要

蜀 下珪反二百十一

並見纂要云人姓梁有蜀閬

嵐

下珪反二百十二

人姓見纂要

名賢氏族言行類稿卷八

欽定四庫全書

名賢氏族言行類稿卷九

宋 章定 撰

裴 二百十四

姓纂嬴姓伯益之後秦非子子孫封裴鄉侯因氏焉
今聞喜裴城是也六代孫陵周僖王封解邑君又徐
邑從依河東聞喜陵裔孫蓋漢侍中九代孫遵始自
雲中從漢光武平隴蜀徙居河東安邑安順之際又

徙聞喜遵玄孫茂侍中尚書生二子輯號東眷徽號
西眷徽曾孫天明子孫又號中眷徽與子楷康綽兄
孫願邈楷子瓚綽子遐號八裴

晉裴秀字季彥八歲能屬文時語曰後進領袖有裴秀
後為司空 子願字逸民博學稽古周弼見而歎曰
願若武庫五兵縱橫一時之傑也 累遷侍中 為
言談之林藪

裴楷字叔則以清通用為吏部郎時人稱見裴叔則如

近玉山映照人也 子瓚字國寶爲中書郎風神高

邁見者皆敬之 憲字景思深弘保素不以世物嬰

心

載記裴嶷字文翼父昶司隸校尉嶷清方有幹畧兄武

爲立菟太守嶷爲昌黎太守 後投慕容廆守定名

分爲羣士啓行廆以爲長史委以軍國之謀 廆謂

羣僚曰裴長史名重中朝而降屈於此豈非天以授

孤也

魏志裴潛字文行爲代郡太守北邊大震百姓歸心太祖褒稱治代之功潛曰潛於百姓雖寬於諸胡爲峻後爲尚書令光祿大夫

南史裴松之字世期博覽墳籍立身簡素 宋武帝尅洛陽松之居州行事武帝曰松之廊廟之才不宜久居邊務召爲太子洗馬轉中書侍郎注三國志既成奏之上曰裴世期爲不朽矣出爲永嘉太守 子駟注史記行於世 駟子昭明少傳儒史之業宋初爲

太學博士 齊永明中使魏武帝曰以卿有將命之才使還當以一郡相賞還爲始安內史又爲廣陵太守歷郡皆清勤常曰人生何事須聚畜一身之外亦復何須 子子野字幾原爲諸暨令不行鞭罰人有爭者示之以理百姓稱悅合境無訟 遷著作郎掌修國史又遷中書侍郎 在禁省十餘年默靜自守未嘗有所請謁

裴邃字深明仕梁爲竟陵太守開置屯田公私便之後

為武信將軍大敗魏師 居身方正有威重將吏憚
之 子之禮字子儀卒於少府卿 之高字如山隨
邃征討所在立功為護軍將軍 之平字如原少倜
儻有志畧累遷太子詹事 之橫字如岳為徐州刺
史

裴忌字無畏少聰敏有識量頗涉史傳為當時所稱仕
陳授豫州刺史善於綏撫甚得人和

裴子烈字大士少有志氣以驍勇聞位北譙太守岳陽

內史

北史裴駿字神駒魏太武曰裴駿有當世才其忠義可
嘉補中書博士 崔浩目為三河領袖 宋使來聘
以駿有才學假散騎常侍於境上勞接 從孫敬憲
字孝虞舉秀才射策高第除太學博士工草隸解音
律後進咸宗慕之 弟莊伯字孝夏器度閒雅博識
多聞為記室叅軍 弟獻伯學尚風流有名京洛位
濟州刺史以清白流譽 安祖駿之從弟弱冠州辟

主簿

裴延雋字平子舉秀才除著作佐郎遷幽州刺史修復
廢渠崇起學校考績為天下最歷官御史中尉吏
部尚書從子夙字買興沈雅有器識人以遠大許
之位河北太守

裴伯茂學涉羣書文藻富贍為中書侍郎及卒魏收賦
詩云臨風想玄度對酒思公榮

裴佗字元化世以文學顯五舉秀才再舉孝廉佗隤

然有器望舉秀才高第除中書博士 遷趙郡太守

轉荊州刺史 剛直不好與俗人交游其投分者必

當時名勝 子讓之字士禮清明俊辯早得聲譽

魏時舉秀才遷主客郎中省中語曰能賦詩裴讓之

與楊愔友善清談竟日愔每云此人風流警拔裴文

季為不亡矣 歷中書舍人容儀蘊藉齊文襄目之

曰士禮佳舍人也除清河太守 子炬字弘大仕隋

遷給事中後為尚書左丞 撰西域圖記諷諸蕃朝

貢帝以炬有綏懷畧進銀青光祿大夫 別見唐書
裴果字戎昭少慷慨有志畧魏時盜賊起果征討每乘
黃驄馬先登陷陣號為黃驄年少 仕周除正平郡
守盜賊屏息 歷眉復二州刺史 子孝仁遷長寧
鎮將甚有威邊之畧

裴寬字長寬弱冠為州里所稱 兄弟天倫篤睦人之
師表 仕周為涇州刺史 弟漢字仲霄在魏除相
府墨曹理職明瞻斷決如流相府語曰日下燦爛有

裴漢

裴俠字嵩和州辟主簿舉秀才後除河北郡守愛人如
子去職一無所取人歌曰肥鮮不食丁庸不取裴公
貞惠為世規矩 嘗與諸牧守俱謁周文周文命俠
別立謂諸牧守曰俠清慎奉公為天下最衆中有如
俠者可與之俱立衆皆默然無敢應者號為獨立使
君 子祥有理劇才少為成都令除長安令 祥弟
肅字神封隋時歷朔貝二州長史俱有能名後授永

平郡丞甚得夷人心及卒夷獠思之為立廟於鄣江之浦

裴文舉字道裕父邃任正平郡守廉約自守每行春省俗單車而已文舉為劔南總管府中郎蜀土商販百倍或勸文舉以利者答曰利之為貴莫若安身身安則道隆非貨之謂是以不為非惡財也

裴叔業少有氣幹後為豫州刺史征南將軍

裴植字文遠後遷度支尚書欲以政事為己任謂人曰

非我須尚書尚書亦須我

裴蘊明辯有吏幹仕隋歷洋直隸三州刺史俱有能名
考績連最煬帝聞其善政徵為太常少卿

裴政字德表在魏授刑部下大夫簿案盈几剖決如流
用法寬平無冤濫為襄州總管

唐裴寂字玄真涉知書傳家貧走京師祈神夜夢老人
曰君年踰四十當貴大業中歷侍御史與唐公厚
預建義功長安平唐公即位曰使我至此者公也

裴矩絳州人有文藻智數仕隋為吏部侍郎 撰西域

圖記 太宗疾貪吏乃遣人遺諸曹一吏受饋縑帝

怒詔殺之矩曰吏受賕死固宜然陛下以計紿之因
即行法所謂罔人以罪非道之以德之誼帝悅為羣

臣言之曰矩廷爭不面從物物若此天下有不治哉

裴行儉字守約絳州人貞觀中舉明經時蘇定方為大
將軍謂曰吾用兵世無可教者今子賢盡畀以術

擢累安西都護西域諸國多慕義歸附 與李敬玄

馬載同典銓有能名時號裴馬 設長名榜銓注等
法 議討突厥京師將吏為刻石以紀功帝親勞宴
曰行儉提孤軍深入萬里兵不血刃而叛黨擒夷可
謂文武兼備矣行儉工草隸名家帝嘗以絹素詔寫
文選自曰不擇筆墨而妍捷者余與虞世南耳 善
知人才 行儉因宴蕃酋將士有礪盤廣二尺文
彩粲然軍吏趨跌盤碎惶怖叩頭流血行儉曰爾非
故也何至是色不少吝

裴光廷字連城開元中擢兵部郎中鴻臚少卿驟歷臺省人未之許而以職業稱議者更推之初吏部求人
不以資考為限其後士人猥衆專務趨競銓品枉撓
光廷懲之因行儉長名榜乃為循資格任門下省主
事閭麟之專主過官凡麟之裁定光廷輒然可時語曰
麟之口光廷手

裴炎字子隆絳州人寬厚有奇節舉明經及第

裴潏河東人篤學善隸書以蔭仕元和初遷左補闕諫

不宜以宮闈人領館驛使 哀聚古今辭章續梁昭明
太子文選自號太和通選上之

裴耀卿字煥之數歲能屬文擢童子舉遷相王府典籤
更直備問府中號學直 遷長安令舊有配戶和市
法人厭之耀卿一切責絕之及去人思之

裴守真絳州人舉進士六科連中授太常博士善容典
時謂才稱其官 累成州刺史政不務威嚴吏民兩
懷 子子餘中明經遷冀州刺史為政惠裕人稱有

恩

裴淮絳州著姓父琰之永徽中為同州司戶年甚少不
主曹務刺史李崇義內輕之吏白積案數百崇義讓
使趣斷琰之曰何至逼人乃命吏連進紙筆為省決
一日畢既予奪當理而筆詞勁妙由是名動一州號
霹靂手為永年令有惠政吏刻石頌美 淮按訊姦
賊執正其罪天下稱之 為吏部侍郎甄拔士為多
裴寬性通敏工騎射彈碁投壺通書記 為潤州叅軍

刺史韋詵有女擇所宜歸會休日登樓見人於後圃
有所瘞藏者訪諸吏曰叅軍裴寬居也詵問狀答曰
寬義不以包苴汙家適有人以鹿為餉致而去不敢
自欺故瘞之詵乃引為判官歸語妻曰今得婿矣寬
時衣碧瘡而長族人呼為碧鸛雀詵曰愛其女必以
為賢公侯妻也何以貌求之卒妻寬舉拔萃為蒲州
刺史州久旱寬入境輒雨徙河南尹不屈附權貴
河南大治寬兄弟八人皆擢明經任臺省州刺史

其為政務清簡所蒞人愛之世冀其得宰相天寶間稱舊德以寬為首

裴諝字士明擢明經遷考功郎中代宗幸陝諝徒步挾南曹印赴行在帝曰疾風知勁草果可信拜河東租庸鹽鐵使時關輔旱諝入計帝召至問權酷利諝久不對帝復問曰臣自河東來涉三百里農人愁歎誠謂陛下先訪疾苦而乃責臣以利帝曰微公言朕不聞此不畏彊禦請列奏郭尚父家奴宰羊犯禁

以寬厚和易為治凡五世為河南尹

裴冕字章甫河中人明銳果於事衆號稱職 玄宗入蜀詔皇太子為元帥冕副之初冕在河西方召還而道遇太子自平涼從至靈武進辭勸太子宜正位凡五請見聽太子即位進同平章事 冕以忠勤自將有詔配饗肅宗廟

裴遵慶字少良絳州人幼強學該綜圖傳不干當世擢吏部判南曹選者以萬計遵慶性彊敏視簿牒詳而

不苛世稱吏事第一初為郎時著王政記述古今治體識者知其公輔器

裴樞字紀聖第進士遵慶曾孫

裴延齡河州人

裴垪字弘中絳州人擢進士第以賢良方正對策第一四遷考功員外郎吏部侍郎委垪校辭判研覈精密皆值才實李吉甫為相問進賢垪即舉筆疏三十許人吉甫藉以薦于朝天下翕然稱得人 以小心

謹默稱帝意常呼官而不名 器局峻整持法度雖
宿貴前望造詣不敢干以私諫官言得失執政多忌
之惟均獎勵使盡言 士大夫不以均年少柄用為
嫌故元和之治百度修舉朝無幸進

裴度字中立河東人貞元初擢進士第以宏辭補校書
郎舉賢良方正異等遷監察御史論權嬖梗切 以
司封員外郎知制誥田弘正獻魏博六州于朝憲宗
遣度宣諭弘正等知度為帝高選故郊迎受命魏人

歡服 王師討蔡以度視行營諸軍還奏攻取策與
帝意合賊傷武元衡及度首議者欲罷度帝怒曰若
罷之是賊計適行吾倚度足破三賊矣度亦以權紀
未張王室陵遲常憤愧無死所自行營歸知賊曲折
帝益信仗 時討蔡數不利羣臣爭請罷兵唯度請
身督戰帝目度曰果為朕行乎度俯伏流涕曰臣誓
不與賊偕存即拜招討使入對延英曰主憂臣辱義
在必死賊未受首臣無還期帝壯之為流涕 度屯

郾城勞諸軍宣朝廷厚意士奮于勇使將顓制號令
一戰氣倍未幾李愬夜入縣瓠城縛吳元濟以報初
元濟禁偶語夜不然燭及度視事下令一切蠲除民
始知有生之樂 程昇皇甫鏘以言財賦幸得宰相
度三上書極論不可 度對君子小人以類而聚未
有無徒者 時元稹等顯結宦官魏弘簡求執政憚
度當國數居中持梗度上書痛暴稹過惡遂罷職俄
擢稹宰相以度東都留守諫官叩延英不可罷度兵

交章極論之會中人使幽鎮還言軍中謂度在朝而
兩河諸侯忠者懷彊者畏今居東人人失望 時閹
豎擅威天子擁虛器搢紳道喪不復有經濟意乃治
第東都集賢里號綠野堂野服蕭散與白居易劉禹
錫為文章把酒窮晝夜相歡不問人間事 帝問度
安否 開成二年復以本官節度河東度堅辭帝命
宣諭曰為朕卧護北門可也 上已宴羣臣曲江度
不赴帝賜詩曰注想待元老識君恨不早我家柱石

衰憂來學孔禱 度退然纔中人而神觀邁爽操守
堅正既有功名震四夷其威譽德業比郭汾陽而用
不用常為天下重輕事四朝以全德始終及沒天下
莫不思其風烈德望焉 子識字通理性敏悟凡經
目未始忘為涇原節度使至治堡障整戎器開屯田
為將士立戍限人人感悅徙靈武地斥鹵無井識誓
神而鑿之果得泉歷六節度使

裴休字公美孟州人操守嚴正方兒童時兄弟偕隱家

墅晝講經夜著書終年不出戶有饋鹿者諸生共薦之休不食曰䟽食猶不足今一啖肉後何以繼擢進士第舉賢良方正異等大中六年進同平章事出歷四節度休不為皁察行所治吏下畏信能文章楷書適媚有體法為人蘊藉進止雍閒宣宗嘗曰休真儒者

梅 二百十五

姓纂殷後紂時有梅伯以國為氏汝南漢將軍梅

銷六代孫嘉始居汝南

前漢梅福字子真九江壽春人明尚書穀梁春秋補南
昌尉願壹登文石之陞涉赤墀之塗當戶牖之法
坐盡平生之愚慮王莽專政一朝棄妻子去九江
至今傳以為仙後有見福於會稽者變名姓為吳市
門卒

南史梅蟲兒齊東昏時為制局監

宋朝梅詢字昌言宣州宣城人也舉進士咸平三年與

考進士於崇政殿 真宗過殿廬中一見詢偉然以

為奇召試中書直集賢院 通判杭州嘗知蘇濠鄂

楚壽陝六州又為兩浙荆湖陝西轉運遷給事中出

知許州卒詢果有才而好名喜進既老又病足嘗撫

其足詈之曰是有鬼不令我至兩府者汝也有所

愛馬亦嘗撫其鞍曰我固命薄矣汝豈無分被繡韉

邪聞者笑之堯臣詢從子也以詩知名

梅摯字公儀成都新繁人也舉進士稍遷太常博士知

蘇州慶厯中為御史權知諫院 仁宗曰梅摯言事

殊有體 拜天章閣待制陝西都轉運使遷龍圖閣
直學士知滑州入知三班院出知杭州徙江寧府拜
右諫議移知河中府卒 摯資性純厚不為矯厲之
行平居未嘗問事云

梅執禮字和勝婺州浦江人也舉進士後拜中書舍人
遷給事中 欽宗即位移知鎮江召為翰林學士道
除吏部尚書兼侍講未及改戶部

梅堯臣字聖俞宣城人也世以詩名堯臣遂以詩聞天下嘉祐元年翰林學士趙槩等言于朝曰梅堯臣經行修明願得留與國子諸生講論道德作為雅頌以歌詠聖化乃得國子監直講官至都官員外郎歐陽脩論其詩曰世謂詩人少達而多窮蓋非詩能窮人殆窮者而後工也

枚 二百十六

姓纂六國時賢人枚被見孟子

前漢枚乘字叔淮陰人為吳王郎中奏書諫吳王逆謀
由是知名景帝召為弘農都尉乘久為大國上賓與
英俊並游不樂郡吏復游梁梁客皆善屬辭賦乘尤
高武帝立乘年老以安車蒲輪徵 子臯

雷 二百十七

姓纂方雷氏之後女為黃帝妃生玄囂蓋古諸侯國
也後漢有雷義蜀有將軍雷同吳陸抗傳有宜都太
守雷譚晉有豐城令雷煥

後漢雷義字仲公為郡功曹嘗濟人死罪罪者以金謝之不受金主伺義不在默投金於承塵上後葺屋得金金主已死乃以付縣曹與陳重為友語曰膠漆自謂堅不如雷與陳

南史隱逸雷次宗字仲倫隱退不受徵辟後徵至都下開館於雞籠山聚徒教授置生百餘人久之還廬山又為築室於鍾山謂之招隱館

北史雷紹字道宗有膂力善騎射辭母求師經年通孝

經 卒於渭州刺史性好施祿賜皆分贍親故

唐雷萬春事張巡為偏將令狐潮圍雍丘萬春立城上與潮語伏弩發六矢著面萬春不動潮疑刻木人謀得其實乃驚遙謂巡曰向見雷將軍知君之令嚴矣

宋朝雷有終同知邵陽人德驤子也德驤在太祖時為殿中侍御史 後遷工部侍郎 有終以父任為萊蕪尉太宗雅聞其名召為大理寺丞 王師北征命為蔚州路隨軍轉運入為鹽鐵判官度支副使出知

昇州又知廣州 領江浙荆湖福建廣南茶鹽制置
使使還知大名徙江陵李順之亂為荆湖夔陝路轉
運使知兵馬事事平拜右諫議知益州次簡州寓佛
舍度賊必至命左右衷甲召土人嚴更備初夕間道
而去賊果圍寺牆壞止得擊柝者賊平知許州改并
州加戶侍代還授戶部使為保信軍留後代還知永
興軍徙秦州

雷簡夫字太簡有隣孫也隱居終南山用杜衍薦為校

書郎秦州觀察推官通判儀州歷知坊間雅三州秩滿會五谿蠻彭仕義擾邊詔遣簡夫乘駟以往簡夫進築城堡以據其險間出兵擾之仕義恐遂降入為鹽鐵判官出知虢州改同知累遷職方員外郎卒簡夫在雅州眉山蘇洵往見之簡夫謂曰子王佐才也薦之于張方平韓琦歐陽修三人者延譽如不及洵名振京師蓋自簡夫始云

臺 二百十八

姓纂臺駘之後漢有侍中臺崇後漢高士臺佟前趙
錄特進臺彥高

後漢逸民臺佟字孝威隱於武安山鑿穴為居採藥自
業州辟不就

晉藝術臺產字國雋漢侍中崇之後專京氏易善圖讖
祕緯天文洛書風角星筭尤善望氣占候推步之術
隱居商洛南山 劉曜時位至特進

來 二百十九

姓纂子姓殷後支孫食邑於邾因以命氏後避事去
邑為來齊有來章秦末徙義陽之新野風俗通楚有
來英漢功臣表軼侯來蒼

軼音待

後漢來歙字君叔南陽人光武拜為太中大夫為人
信義言行不違及往來游說皆可案覆西州士大夫
皆信重之 曾孫歷字伯珍少襲爵朝廷咸稱社稷
臣

蜀志來敏字敬達涉獵書籍善左氏春秋為太子家令

子忠亦博覽經學有敏風

南史來嶷字德山幼有奇節兼資文武

北史來大千代人也驍果善騎射遷幢將典宿衛禁旅
用法嚴明上下齊肅以戰功賜爵廬陵公

來護兒字崇善廣陵人也常曰大丈夫當為國滅賊以
取功名安能區區專事筆硯後平江南位大將軍
除泉州刺史招懷初附威惠兼舉焉隋文嘉其功
使畫工圖其像以進遷瀛州刺史以善政聞煬

帝曰昔國步未康卿為名將今天下無事文為良二千石可謂兼美 封榮國公 子整尤驍勇討擊所向皆捷諸賊歌曰長白山頭百戰場十五五把長鎗不畏官軍千萬衆只怕榮公第六郎

來濟亦護兒子為文章善議論曉時務擢進士貞觀中太子承乾敗太宗問侍臣何以處之莫敢對濟曰陛下下上不失為慈父太子得盡天年則善帝納之

來恒濟異母兄上元中為黃門侍郎以學行稱父子相

次知政事

來瑱邠州人父曜四鎮節度使著名邊境瑱尚名節廓
然有大志天寶初詔舉智謀果決才堪統衆者張鎬
薦能斷大事有禦侮才拜汝南太守改潁川賊攻瑱
手射賊應弦仆以功就加河南招討使能撫訓士舉
動安重賊不敢侵上元春破史思明餘黨斬首萬
級明年詔還襄漢士宜其政後改山南六州節度
宋朝來之邵字祖德開封咸平人也舉進士哲宗即

位遷大府丞為秦鳳路提舉常平利州成都府路轉
運判官入為開封府推官復監察御史遷殿中侍御
史擢侍御史除刑部侍郎卒年四十八蔡京為相
特贈之邵太中大夫

柴二百二十

姓纂姜姓齊文公子高後高孫奚以王父字為氏十
代孫高柴仲尼弟子孫舉又以王父名為柴氏漢有
棘蒲侯柴武裔孫文平陽柴文晉末為晉陽太守因


家馬

唐柴紹字嗣昌晉州人唐高祖妻以平陽公主高祖即位拜大將軍吐谷渾党項寇邊敕紹討之虜據高射紹軍士失色紹安坐遣人彈琵琶使二女子舞虜疑之休射觀紹伺其懈以精騎從後掩擊虜大潰後平梁師都轉左衛大將軍出為華州刺史

宋朝柴禹錫字元圭大名人也嘗事太宗于晉邸擢樞密副使出知滄州潞州徙永興軍復召為樞密

至道初除鎮寧軍節度使知涇州徙陝州以子宗慶
尚主召歸京師頃之復令赴鎮卒

柴宗慶字天祐尚太宗女魯國長公主除左千牛衛
將軍駙馬都尉



名賢氏族言行類稿卷九

欽定四庫全書

子部

名賢氏族言行類稿卷十一

詳校官典籍_臣潘奕雋

主事_臣祁韻士覆勘

總校官進士_臣朱鈐

校對官中書_臣張曾炳

謄錄監生_臣安樂宇

欽定四庫全書

名賢氏族言行類稿卷十

宋章定撰

崔

二百二十一

姓纂姜姓齊太公生丁公伋生叔乙讓國居崔邑因
氏焉自穆伯至沃叔成良代為卿大夫良十五代孫
意如秦東萊侯生二子伯基仲牟伯基居清河東武
城仲牟居博陵安平並無著姓見姓氏英賢傳

左傳僖公二十八年晉侯齊國歸父崔夭次於城濮楚師背鄩而舍

襄公二十三年齊侯伐衛商子游御夏之御冠崔如為右二十七年崔成請老於崔子許之棠無咎弗子曰崔宗邑也必在宗主寺人曰崔氏有福

成公十七年齊侯使崔杼為大夫慶克佐之帥師圍盧崔杼崔武子也

後漢崔駰字亭伯涿郡人十三通詩易春秋善屬文

竇憲揖為上客出為長岑長 子瑗字子玉明天官
歷數舉茂才遷汲令開稻田數百頃百姓歌之 子
寔字子真舉至孝獨行除為郎明於政體吏才有餘
為五原太守教民紡績織紵民以免寒苦母劉氏有
母儀淑德博覽書傳常訓寔以臨民之政寔之善績
母有助焉 崔氏世有美才兼以沉淪典籍遂為儒
林之家

文苑崔琦字子璋少遊學京師以文章博通稱舉孝廉

為郎數引古今成敗以戒梁冀冀不能受乃作外戚箴

魏志崔琰字季圭遷中尉鬚長四尺甚有威重朝士瞻望而太祖亦敬憚焉

崔林字德儒除鄒長貧無車馬單步之官德政為最擢為翼州主簿後遂為司空

晉書崔洪字良伯博陵人少以清厲顯名骨鯁不同於物人有過輒面折之為尚書左丞語曰叢生棘刺

來自博陵在南為鷁在北為鷹 遷吏部尚書 子
即散騎侍郎亦以正直稱

儒林崔遊字子相自少及長口未嘗語及財利 為氏
池長甚有惠政

南史崔祖思字敬元琰七世孫仕齊為青冀二州刺史
在政清勤而謙卑下士 叔父景真位平昌太守有
惠政常懸一蒲鞭而未嘗用去任之日土人思之為
立祠 子元祖為東海太守上每思之時節恒賜手

敕賞賜有加

崔仲文位徐州刺史後除黃門侍郎

儒林崔靈恩仕梁兼國子博士 解析經理甚有精緻

都下舊儒咸稱重之

文學崔慰祖字悅宗父慶緒梁州刺史慰祖料得父時
假貫文疏悉火焚之

孝義崔懷順清河東武城人也

北史崔宏字玄伯少有雋才號曰冀州神童 領冀州

從事出總庶事入為賓友衆務修理處斷無滯仕

魏為黃門侍郎陳古人制作之體及往代廢興之

由甚合上意未嘗蹇諤忤旨亦不諂諛苟容子浩

字伯深博覽經史玄象陰陽百家之言無不該覽明

元初拜博士祭酒常校帝經書嘗與明元論事帝

大悅語至中夜賜浩御縹醪酒水精鹽曰朕味卿言

若此鹽酒故與卿同其味也博聞強識精於天人

之會明識天文好觀星變加侍中特進纖厓

懦弱手不能彎弓持矛其胷中所懷乃踰於甲兵

崔逞字叔祖道武禮遇甚厚拜尚書錄三十六曹尋除御史中丞文學器識當年之俊 子頤字太冲為冀

州刺史

崔休字惠盛舉秀才入京師累遷黃門侍郎 為渤海太守性嚴明雅長政體下車先戮豪滑數人姦盜莫不擒剪入為吏部郎中 歷幽青二州刺史皆以清白稱 入為度支七兵殿中三尚書久在臺閣明習

典故朝廷疑議咸取正焉 諸公咸謂崔尚書下意

處不可異也 子悛字長孺仕魏歷黃門侍郎 齊神

武常言崔悛應作令僕恨其精神太遒 李渾將聘

梁名輩畢萃悛後到一坐無復談話鄭伯猷嘆曰身

長八尺面如刻畫聲敎為洪鍾響胷中貯千卷書使

人那得不畏服 子瞻字彥通李神雋曰昨見崔悛

兒便為後生第一年十五署主簿楊愔引為中書侍

郎 後除太子中庶子敕曰東宮弱年未陶訓義卿

儀形風德人之師表故勞卿朝夕遊處開發幼蒙

瞻性方重好讀書酒後清言聞者莫不傾耳 悛弟

仲文為丞相掾沙苑之敗持馬尾渡河波中乍没乍

出齊神武曰卿為君為親不顧萬死可謂家之孝子

國之忠臣也 悛為侍中仲文為銀青光祿大夫同

日拜授時云兩鳳連飛

崔儵字岐叔署其戶曰不讀五千卷書者無得入此室

初舉秀才為散騎侍郎 歷尚書郎與李若俱見稱

重語曰京師灼灼崔儵李若 仕隋累遷散騎侍郎

崔通字寧祖有名於時為慕容垂尚書左丞 曾孫延

壽冀州主簿 延壽字隆宗簡率友悌居喪以孝聞

位蘭陵燕二郡太守

崔鑒字神具綽之子也為徐州刺史於州銅冶為農具

兵人獲利

崔伯謙字士遜齊神武召補相府功曹稱之曰伯謙清
直奉公真良佐也除濟北太守縣公田多沃壤咸易

之以給人又改鞭用熟皮為之不忍見血示恥而已
後除鉅鹿太守

崔辨字神通獻文拜為武邑太守政事之餘專以勸學
子景儁鯁正有高風好古博涉以經明行修拜中書
博士

崔楷字季則為左中郎將性嚴烈能摧挫豪強語曰莫
獬廌付崔楷

崔士謙仕周授荊州刺史外禦強敵內撫軍人風化大

行號稱良牧考績常為天下之最 子彭事母以孝
聞後遷驃騎將軍 善射聞於虜庭 士謙弟說遷
涼州刺史 子弘度拜襄州總管長安語曰寧飲三
斗醋不見崔弘度

崔挺字雙根舉秀才射策高第拜中書博士 拜光州
刺史孝文帝問以臨邊之畧因及文章甚悅之謂侍
臣曰擁旄者皆如此何憂哉子孝芬字恭梓累遷定
州大中正 後兼吏部尚書

崔猷字宣猷性鯁正有軍國籌畧 智畧明瞻有應變之才終授大將軍 子仲方字不齊隋文帝初上便宜十八事授司農少卿 從叔昂字懷遠事母以孝聞孝芬曰此兒終當遠至是吾家千里駒也 仕齊兼大司農卿轉廷尉卿 典京畿詔獄 齊文宣指昂曰此是國家名臣又曰崔昂直臣

崔振字延根孝文徵為尚書左丞 以才幹被擢當世為榮 除廷尉少卿 為肆州刺史在任有政績

崔季舒字叔正仕齊累遷儀同三司推薦人士獎勸文學

崔暹字季倫累遷定州大中正遷御史中尉魏帝

宴華林園謂神武曰朝廷中有直言彈劾不避親戚者王可勸酒神武言唯崔暹一人敢以酒勸後遷太常卿

崔延伯少以武壯聞除征虜將軍志尚雄猛國之名將

崔光本名孝伯拜著作郎為孝文所知待常曰孝伯才
浩浩如黃河東注固今日之文宗也後兼侍中子
劼字彥玄仕齊轉五兵尚書弟子鴻字彥鸞為散
騎常侍丁父憂甘露降其廬前樹

崔亮字敬儒仕魏累遷吏部郎廉慎明決尚書郭祚每
云非崔郎中選事不辦遷吏部尚書三子士安士和
士泰並強幹善於當世從父弟光韶遷青州長史
清直明斷吏人畏愛之再遷廷尉卿居雅仗正有國

士之風其家資產皆弟光伯所營光伯亡悉焚其契
光伯為北海太守明帝詔曰光伯自涖海沂清風
遠著可更任三年以廣風化

崔道固字季堅美容貌善舉止宋孝武曰道固容止如
此豈可為寒士 歸魏為南冀州刺史

崔彥穆仕周進驃騎大將軍 詔使於陳彥穆器度方
雅風韻閑曠甚為江表所稱

隱逸崔廓字士玄山東學者皆宗之不應辟命 子贖

字祖潛為豫章王侍讀後去王重之不已遺書曰足下博聞強記視漢臣之三篋似陟蒙山對梁相之五車若吞雲夢

列女房愛親妻崔氏性嚴明有高節歷覽書傳多所聞知王景伯為太守每有疑獄常先請焉

鄭善果母崔氏性賢明有節操善果出聽事母輒坐胡床於障後察之聞其剖斷合理歸則大悅若行事不允乃蒙袂而泣終日不食善果由此克己號為清

吏

唐崔善為貝州人巧于歷數仕隋四方有疑獄悉令按訊皆究其情 隋亂勸高祖圖天下擢尚書以清察稱

崔敦禮字安上咸陽人涉書傳以節義自將武德中官通事舍人善辭令進止觀者皆悚 擢中書舍人四遷兵部侍郎出為靈州都督 會薛延陀寇邊與李勣合兵破之 通知四夷情偽少慕蘇武為人故

屢使突厥前後建明允會事機

崔義玄貝州人太宗討世充數用其謀東都平轉隰州
都督府長史真觀初歷左司郎中兼韓王府長史與
王友孟神慶志趣不同而俱以介直自任義玄有章
句學先儒疑繆或音詁不通者輒采諸家條分節解
能自正之高宗詔與博士討論五經

崔神基長壽中為司賓卿同鳳閣鸞臺平章事舉明經
武后時累遷萊州刺史入朝行制億歲殿奏事稱旨

始至有詔改錢弊法州縣布下俄而物價踊昂百
賈驚擾神基質其非于朝果豪猾妄為之后喜下制
褒美 弟神慶

崔琳明政事琳與弟太子詹事珪光祿卿瑤俱列榮戟
世號三戟崔家 初玄宗每命相皆先書其名一日
書琳等各覆以金甌會太子入帝謂曰此宰相名若
自意之誰乎即中且賜酒太子曰非崔琳盧從愿乎
帝曰然賜太子酒時兩人有宰相望

崔融字安成齊州人擢八科高第累補宮門丞崇文殿
學士遷鳳閣舍人 為文華婉當時未有輩者朝廷
大筆多手敕委之其洛出寶圖頌尤工

崔從字子乂隱太原山中會歲饑拾橡實以飯講學不
廢擢進士第為人嚴偉立朝稜稜有風望不喜交權
利忠厚而讓

崔能字子才與從皆秉節居鎮世傳為榮

崔慎由字敬止聰警強記資端厚有父風采由進士第

擢賢良方正異等官至太子太保

崔安潛字進之擢進士第王仙芝寇河南安潛募人增
陴繕械不以力費斬賊二千仙芝解去數除盜賊
有功於吏事尤長

崔彥曾曉律令長於撫民

崔仁師定州人陳叔達薦仁師才任史官正觀初改

殿中侍御史時青州有男子謀逆有司捕支黨累

繫填獄詔仁師按覆諸囚咸叩頭曰崔公仁恕必無

枉者由是知名 遷度支郎中嘗口陳移用費數千
名太宗恠之詔杜正倫持簿使仁師對唱無一謬帝
竒之 帝幸翠微宮上清暑賦以諷帝稱善

崔湜字澄瀾第進士父子同為侍郎 與弟液澄以文

翰居要官每宴私自比晉王謝嘗曰吾一門入仕歷

官未嘗不為第一 湜執政年三十八嘗暮出端門

緩轡諷詩張說歎曰文與位固可致年不可及

崔液字潤甫工五言詩湜呼曰海子我家龜龍也 作

幽征賦以見意 澄本名滌元宗改焉

崔玄暉博陵人舉明經 居父喪盡禮所守以清白名
母亡哀毀甘露降 為天官侍郎當公介然不受私
謁三世不異居家人怡怡如也族人貧孤者撫養教
厲少頗屬辭晚以非已長專意經術

崔渙博綜經術長論議 吏部侍郎嚴挺之施特榻試
彝尊銘謂曰子清廟器故以題相命 出為巴西太
守玄宗西狩迎謁于道帝見占奏以為明治體恨得

之晚 子縱授藍田令德化大行縣人立碑頌

崔碣字東標及進士第為河南尹決王可久妻按得罪
狀實以妻還之時淫潦獄決而齊都民相語歌舞於
道

崔日用滑州人擢進士第 會帝誕日采詩大小雅二
十篇及司馬相如封禪書獻之借以諷諭

崔日知字子駿少貧力學以明經進自以處朝廷久每
入謁必與尚書齒時謂尚書裏行

崔沔字善冲京兆人事親篤孝擢進士舉賢良方正高第不中者誦訾之武后敕有司覆試對益工遂為第一岑義歎曰君今却詵也 性舒遲進止雍如當官則正言不得而屈 喜論得失嘗曰百官分職上下相維以成至治豈可俛首懷祿邪 儉約自持祿廩隨散宗族不治居宅嘗作陋室銘以見志

崔隱甫貝州人遷洛陽令胡鵠善笛有寵嘗負罪匿禁中帝召隱甫指曰就卿丐此人對曰陛下輕臣而重

樂工請解官帝遽謝與胡鵬隱甫殺之拜御史大夫
初臺無獄季乾祐為大夫請置獄隱甫執故事廢
掘諸獄 帝嘗詔校外官歲考異時必委曲叅審竟
春未定隱甫一日會朝集使詢逮檢實其暮皆訖議
者服其敏 不肯見牛仙客 所至潔介自守明吏
治在職以彊正稱

崔圓字有裕貝州人志向卓邁喜學兵家 開元中舉
遺逸以鈐謀對策甲科銳功名初聞難刺楊國忠意

乃治城浚隍列館宇儲什具帝次河池圓䟽具陳蜀
土腴穀羨儲供易辦帝省書泣下曰世亂識忠臣拜
平章事 肅宗立命赴行在所帝為製遺愛碑於蜀
以寵之徙淮南節度使在鎮六年請朝京師吏民乞
留

崔光遠系出博陵祖敬嗣中宗德之及有同姓名者每
擬官帝輒拜後召見悞乃訪真敬嗣已死即授其子
五品官

崔祐甫字貽孫第進士遷中書舍人性剛直遇事不回
時侍郎闕祐甫攝省事數與宰相常袞爭議不平
會朱泚軍中貓鼠同乳表其瑞詔示袞袞率羣臣賀
祐甫曰可弔不可賀代宗異其言至德以來天下
戰討官賞謬紊元載誅袞當歸凡奏請一杜絕之惟
文辭入第乃得進然無所甄異賢愚同滯及祐甫則
薦舉惟其人不自信畏推至公以行未踰時除授幾
八百員莫不諧允神策軍使王駕鶴者權震中外帝

將代之懼其變以問祐甫祐甫召駕鶴語移時而代者已入軍中矣 淄青李正己畏帝威斷表獻錢三十萬緡帝意其詐祐甫曰正己誠詐不如因遣勞其軍帝曰善議者題其謀謨謂可復貞觀開元之治故事門下侍郎未有贈三師者帝以其有大臣節特異寵之

崔植字公脩博通經史於易尤邃元和中為給事中皇甫鎛判度支建言減百官俸植對還詔書 長慶初

拜中書侍郎同平章事穆宗問貞觀開元中治道最盛何致對云云今願陛下以無逸為元龜

崔寧貝州人嚴武為劍南節度使奏為漢州刺史吐蕃破招靜等州武遣寧簿賊城虜衆驚相謂曰寧神兵也

崔漢衡博州人沉懿博厚善與人交漢衡誠信素著虜亦尊重屢使幽州還命稱旨

崔造字元宰深州人與韓會盧東美張正則三人友善

好言當世事自謂王佐才故號四宜 貞元元年以
給事中同平章事帝謂造敢言為能立事故不次用
之 造久在江左疾錢穀諸使罔上或干沒自私乃
建言天下兩稅請委本道觀察刺史諸道有鹽鐵處
仍置巡院歲盡宰相計最殿以聞

崔戎字可大元暄從孫也舉明經雲南亂戎持節劍南
為宣撫使奏罷稅外薑芋錢公私便之 為華州刺
史吏以故事置錢萬緡為刺史私用戎不取及去召

吏曰籍所置錢享軍徙兗海沂密觀察使民擁留

于道不得行乃休傳舍民取其犍至兗州鉏滅姦吏

十餘民大喜子雍

崔元畧博州人第進士

崔鉉字台碩擢進士第會昌中拜中書侍郎同平章事

凡三歲至宰相出為淮南節度使帝餞太液亭賜詩

寵之

崔龜從字元告初舉進士復以賢良方正拔萃三中其

科遷太常博士最明禮家沿革

崔沆字內融鉉之子也

崔邠字處仁貝州人三世一爨當時言治家者推其法
第進士復舉賢良方正遷補闕上疏論裴延齡姦以
鯁亮知名 性溫裕沉密行已簡儉憲宗器之 為
太常卿故事太常始視事大閱四部樂都人縱觀邠
自第去帽親導母輿公卿見者皆避道都人榮之

崔邠字廣畧邠弟姿儀偉秀人慕之然不可狎也中進

士第遷吏部員外郎下不敢欺每擬吏親挾格褒黜
必當寒遠無留才 三遷諫議大夫 敬宗嗣位拜

翰林侍講學士謝曰陛下使臣侍講半歲不一問經
義臣無功不足副厚恩帝曰朕少閒當請益 為號

州觀察使先是上供財乏則奪吏俸助輸率八十萬
郾曰吏不能贍私安暇卹民吾不能獨治安能自封
以府常費代之 又詔賦粟輸太倉者歲數萬石民
困於輸郾乃旁流為大教受粟實而注諸槽民悅忘

輸之勞 治號以寬經月不答一人及涖鄂則嚴法
一不貸或問其故陝土瘠而民勞吾撫之所服鄂土
沃民剝雜以夷俗非威未能政貴知變也

崔鄆弟及進士第文宗末同平章事 崔氏四世總
麻同爨兄弟六人至三品鄆鄆凡為禮部五吏部
丹唐興無有也居光德里宣宗曰鄆一門孝友可為
士林法因題曰德星堂里為德星社

崔鄆及進士第

崔衍字著深州人擢明經調清源令勸民力田懷附流
亡歷蘇號二州遷宣歙池觀察使簡靜為百姓所
懷幕府奏聘皆有名士

崔宏禮字從周磊落有大志通兵畧過宣武從劉元佐
獵夷門元佐臂鷹與馳逐急緩在手一軍驚曰安得
此奇客及進士第遷河陽節度使治河內秦渠溉
田千頃歲收八萬斛李同捷叛宏農破之獲鎧
裝數十萬李祐以鄭滑兵三千入齊而潰宏禮為

出鄆兵二千祐遂大破賊尸藉十餘里祐望鄆拜曰
活我者崔公也

崔玄亮字晦叔磁州人擢進士第遷寧歙二州刺史民
山處輸租者苦之許計斛輸錢民賴其力 改諫議
大夫朝廷推為宿望每遷官讓形於色鄭注構宋申
錫捕逮倉卒內外震駭玄亮率諫官叩延英苦諍反
復數百言衆服其不撓由此名重朝廷

崔羣字敦詩貝州人未冠舉進士陸贄主貢舉梁肅薦

其有公輔才擢甲科舉賢良授祕書省累遷中書舍
人數陳謹言憲宗嘉納 田季安以五千錢助營開
業佛祠羣以無名之獻不當受有詔却之 權長孺
坐罪抵死其母老丐子以養帝問宰相羣對宜即遣
使諭旨於是免死凡啓奏平恕如此 處州刺史苗
積進羨錢七百萬羣以受之失信天下請還賜其州
以紓下戶之賦

崔損字至無中進士博學宏辭 後歷華要至宰相

崔咸字重易博州人擢進士第中宏辭為御史處正特
立風采動一時遷陝虢觀察使日痛飲夜分輒決
事無一毫差吏稱為神咸素有高世志造詣蘄遠間
游終南山乘月吟嘯至感慨泣下諸文中歌詩最善
崔珙父穎官同州刺史生八子皆有才世以擬漢荀氏
八龍珙為人有威重精吏治以拔萃異等累擢嶺
南節度使入對延英文宗訪治撫後先珙對精亮有
理趣帝咨嗟子洎

崔琯字從律琰之兄舉進士賢良方正皆高第行方
介有器蘊人屬以為相卒不至當時共咨嘆云弟

琰與尤顯

崔澹琰之子舉止秀峙時謂玉而冠者擢進士第時士
大夫以流品相尚推名德者為之首而澹與焉

崔遠澹之子有文而風致整峻世慕其為人目曰釘座
梨言座所珍也諸崔自咸通後有名歷臺閣藩鎮
者數十人天下推士族之冠

崔彥昭字思文清河人淹貫儒術擢進士第吏治精明所至課最由河陽節度使徙河東先是沙陀諸郎多犯法彥昭撫循有威惠三年境內大治耆老叩闕願留詔可

崔信明青州人生五月五日方中有異雀鳴集庭樹太史占此兒將以文顯及長彊記美文章高孝基曰崔生才富為一時冠

崔元翰舉進士博學宏辭賢良方正皆異等知制誥其

訓辭溫厚有典誥風其好學老不倦用思精緻馳騁
班固蔡邕間以自名家

五代崔居儉清河人也祖蠡父蕘皆為唐名臣居儉美
文辭風骨清秀少舉進士梁真明中為中書舍人翰
林學士御史中丞唐莊宗時為刑部侍郎太常卿崔
氏自後魏隋唐與盧鄭皆為甲族吉凶之事各著家
禮至其後世子孫專以門望自高為世所嫉

崔稅字子文深州安平人也父涿唐末為刑部郎中梁

貞明三年舉進士開封尹王瓚辟掌奏記稅性至孝
其父涿病不肯服藥曰死生有命何用藥為稅屢進
醫藥不納每賓客問疾者稅輒迎拜門外泣涕而告
之涿終不服藥而卒 晉高祖時以戶部侍郎為學
士承旨權知天福二年貢舉時有進士孔英者素有
醜行為當時所惡稅既受命往見桑維翰維翰素貴
嚴尊而語簡謂稅曰孔英來矣稅不喻其意以謂維
翰以孔英為言乃考英及第物議大以為非即罷學

士宋尚書左丞遷太常卿

宋朝崔彥進大名人也少有膂力善騎射漢乾祐中隸周大祖帳下累遷至昭州刺史至國初從征李筠為先鋒以功領武信軍節度使

崔翰字仲文京兆人也少有大志風姿偉秀太祖一見而奇之以隸麾下及即位擢至刺史至太宗嗣位進端州團練使太宗講武近郊命翰專金鼓軍容甚整肅太宗悅以藩邸時金帶賜之知定州又徙鎮

鎮安帥高陽召還以疾留京師疾間見於太宗言曰
臣不願死於家願馬革裹尸死於邊塞太宗壯其言
復令赴治所卒翰沉毅有謀所至多成功輕財好施
死之日家無餘貲晚年酷信釋氏云

崔鷗字德符潁州陽翟人也舉進士宣和末通判寧化
軍朝廷悟其賢召為殿中侍御史既至而欽宗即位
徙右正言即上章乞斬蔡京以謝天下為萬世亂臣
賊子之戒以疾求致仕乃以直龍圖閣提舉崇福

宮 鷗有古學為文雄深作詩清峭學者稱之

崔立字本仁許州長葛人也舉進士積官至給事知濠
州以工部侍郎致仕 立淳謹喜論事方朝廷講禮
文之事士大夫爭獻贊頌立獨言水發徐兗旱連江
淮無為有烈風金陵有大火是天所以戒驕矜也而
中外多士上雲露草木禽蟲諸物之常瑞此何足為
治道言哉願詔史官勿復紀錄

崔頤正開封雍丘人也與弟偓仝並舉進士明經為國

子直講咸平初年真宗召順正日赴御書院說尚書至十卷以老致仕仍充直講改國子博士

崔偓佺自連江尉李至奏為直講後遇真宗幸國子監召偓佺說尚書義真宗甚善之

崔遵度字堅白本江陵人也舉進士祥符初同修起居注真宗東封進博士祀汾陰為左司諫遵度掌右史十餘載立殿墀上常退匿楹間慮為上所見其恬於勢利有如此仁宗為皇太子遷左諭德卒特贈工部

侍郎

邾 二百二十二

殷氏子孫食采於邾因以為氏

萊 二百二十三

左傳萊子國為齊所滅以國為氏今萊州是其故地晉
有大夫萊駒漢有萊章 北海今青州有萊氏

哀 二百二十四

風俗通魯哀公之後漢有哀章述異記宋有哀道訓

南康贛縣宋哀道訓道遷代居贛今處州多此姓

開 二百二十五

衛公子開方之後漢有開章

槐 二百二十六

左傳富父槐之後以王父字為氏

回 二百二十七

祝融子吳回之後又古賢者方回之後

斂 二百二十八

八斨墮斨之後以王父字為氏

懷二百二十九

無懷之後吳志顧雍傳有尚書郎懷叙 春秋時野王

邑漢為河內郡武德初於栢崖城置懷州

槐二百三十

殷王帝槐之後唐有槐元忠槐公儉並居揚州

名賢氏族言行類稿卷十